

瞞老鼠

這站啊，佢總感覺，屋家个洗衫間有老鼠。做麼係感覺？因為毋識看著老鼠个魂影。無看著，又仰脣知講有老鼠？因為有鼻著得人畏个老鼠糞。毋過，吾老公講：「係妳忒神經質咧！若係若鼻公有恁靈，啊無，佢在若頸根項縊一條索，佢牽你，偲等來去山頂獵山豬轉來滷醃好咧！」分老公恁泥打落，實在真毋甘願，這隻老鼠會攏人！若無同佢抓著來，定著無放佢煞！

過後，見若衫洗好、晾好，閒閒斯擎緊掃把在洗衫間這撞該撞、這位掃下、該位掃下。有一日……噉～！分佢看著咧噉！毋係看著老鼠，係掃著一堆大嫲堆个老鼠屎。落到樓下，同老公講這件事，佢又還毋信，講：「無影無跡个事情，也講都有手有腳！該洗衫間在該三樓尾項，老鼠仰脣跋得上？你喊佢跋分佢看！」哼！又毋信！啊無，該堆老鼠屎對哪來？看佢捉老鼠分你看！

有一個祭日，還洗緊衫，目珠尾睇著一個烏影，對矮牆上背个鐵窗桎脣恬恬趨過來，噉！一隻大嫲隻又肥律律个烏老鼠。原來啊！吾屋脣係一搭空地，比人還較高个管榛同五爪金英生都滄滄，有兜碗公花還會遞到水管面頂；鄰舍不時又在該草埔項倒菜蓋、飯糝、樹樞、落葉這兜，講使得嫗來做肥料。老鼠斯在該搭空地上背遊遊野野，有好絡食、又有塞塞个草埔好園，無愁無慮，斯越降越多、越養越大陣咧。下把下無哪好去，斯跨遞到壁脣、水管个藤趨上來。

看啊著老鼠，斯遽遽抓掃把愛來拈佢，該隻老鼠看著佢惡豺豺愛拈佢，斯像無愛命个樣，對三樓个鐵窗桎脣一下斯跳往落，聽著「哼！」聲下，噉！好勢咧噉！佢話該隻老鼠對恁高个所在擲落去包佢死無命咧，探頭看往落，看著佢跛啊跛，跛兩、三下過，加一下添斯跋起腳走去尾瀉屎，又鑽入草埔裡肚去咧。啲！恁勒命！恁高擲落去也無事！

佢轉身去看佢走出來个位所，係一個已久無用、孬嘴个花盆，手賤賤斯同佢搨下，接目看著个，係佢既經尋當久个茶籬、鬃刷、洗衫袋、桌布…這兜東西。進前還緊悵著自家曾正經恁無頭神，用過个東西黏時斯毋記得放在哪咧！原來～，係分老鼠拉到這位來咧！同這兜東西拖拖出來，阿～姆哀哦！手摸著軟軟，一竇十外隻，歸身紅芽紅芽、無生半支毛个細老鼠子在該肚吱吱啾啾；晟啊著光線，一隻一隻斯想愛趨往出。佢嚇去連鞋都無掛著，吱著無命，一路跳往落，遽遽咻隔壁个細阿哥上來搨手同佢處理撒。老

鼠子抔撇正恸著：毋著咧！老鼠子應該留項來做證據。無又會有人講佢係講一個影，生一個頸！

自該擺了後，驚怕老鼠嫲又來做竇養子，斯來大拚掃囉！除撇將無用著个塑膠袋收收撇，莫又分老鼠嫲拉去絮竇以外，該兜無用个花盆、花鉢，做下也同佢請請去垃圾車項，想講這兜垃圾清清撇咧，老鼠無哪好園，應該毋會過再來正著！毋係哦！三不二時，細人上去收衫褲，還輒輒會分該隻好恬恬撞出來个老鼠嚇去吱吱滾哦！驚佢又同佢降降擎歸陣老鼠子來，越撼越大棚，到尾項會毋得收煞，斯歸日恸心打事愛來捉老鼠。

人同佢講：用毒較快！佢又毋敢，驚講莫正經分佢毒著死撇，又毋知佢死在哪位，死老鼠臭拂拂，愛臭幾～下日、會搨死人；無，斯用籠來裝好咧哪！打先，在籠肚吊兜細人食个糖、餅；幾下日咧，還捉佢毋著。啲！敢係糖餅無罇香？無換吊煙腸好咧！該煙腸佢還特別用茶油同佢煎去香酥香酥，奇怪！佢又還係毋入籠去；到底，這隻老鼠想愛食麼个！舞到尾下，麼个鹹鯪魚、雞排、焙鴨……，三、兩日斯同佢換下菜色愛錫佢入籠，毋過～吊到這兜東西都生菇泌背咧，老鼠連鼻都毋同佢鼻，甘願去喫苦蒂蒂个茶箍，喫去一孔一缺，乜毋肯著釣，吾老鼠籠肚毋識裝著半隻老鼠。人又同佢講：「恁省做麼个！若老鼠籠啊！一定係去借人該識捉過老鼠个，有老鼠味，佢有鼻著！正捉佢毋著啦！你愛用金紙同佢焚焚啊嚟！無斯使兜錢，過去買過新个籠啦！」冤枉哦～！吾老鼠籠正對店項買轉來，還新衝衝，哪識捉過老鼠！

用籠捉佢毋著，無，來用黏个好咧！去雜貨店買黏老鼠个枋，頭家教佢，愛買加幾兜，牆頭面、牆頭下、水管脣、洗衫機、洗衫槽下背…，老鼠會行過个路項做下愛放。佢聽頭家个話，一到買佢十垵轉來，洗衫間滿哪都放放擎。

過無幾多日，愛入洗衫間進前，唉～！聽著水槽下背嘩嘩啱啱，著咧啱！三步做兩步走緊過去，伏落水槽下，一看，哦～！黏著一隻毋知係愛走來做麼个瓦雀啦！嘴肚嚙嚙啱啱，手項遽遽同佢對枋項救落來，該隻冤枉个瓦雀，圓身个毛分佢扯撇歸大片，歸身个毛同翼胛，做下分枋項个膠膏去膏膏浹浹，驚佢飛毋跣來無法度絡食會柮死，高不如將同佢畜在籠肚，等到佢毛生齊、會飛咧正放佢去。

為著佢愛捉老鼠，嘎「火燒山，累著猴」，除撇會黏著瓦雀以外，枋項還不時黏著該兜衰過个黃蜚、金姑、蟻公……這兜細蟲，長在看著厥等四腳惹天緊在該蠕蠕動；有一到，還看著壁蛇个半截尾黏在枋面，血流血汀在該拂啊拂！，實在衰過！講正經个佢毋係挑故意个哦！佢在捉老鼠，若這兜生靈毋好緊走來哪！講乜奇怪！明明都看著老鼠

个腳跡在老鼠枋脣頂踏上踏落，都無路好行咧，也毋識分佢黏著半擺，佢到底行對哪位過？

著啦！有一到，該隻老鼠差一屑都分佢捉著：厥該條長長个老鼠尾，可能一下無注意，分老鼠枋嗒 (dab`) 著走毋去，拖核枋，在洗衫間撞上撞落，拚死命緊掣，尾頂拖核一坵枋也想愛蹶上壁瀉走，遽遽擎掃把、畚斗想愛來杯佢，都還言斡頭咧，聽著老鼠枋對牆頭上背「咯！」聲下跌落來，嗯～啊吾老鼠咧？唉哦！又分佢遁走咧啦！佢奮命拉，同尾拉斷撇，單淨看著老鼠枋頂留著一節皮在該，唉！硬硬都愛捉著咧講！實在有罉打爽！

想空想缺愛捉老鼠，到這下歸半年咧～，拖爛頭那皮也實在想毋出麼个把變好來捉該隻精過骨个老鼠！老公誚難佢：「今若老鼠諾？捉恁久也無看著魂、無看著影，到底係有也無？」捉毋著老鼠，佢既經都火屎轟天咧，還在該講該兜有个無个消遣佢，實在真無想愛聲佢，詐意無聽著。

毋過，想著愛過捉老鼠也真懶頭咧！到這下，兩隻老鼠籠還本本放在窗門桎脣，連收都懶尸去收；裡背个餌早都乾燥撇、無斯分蟻公擎淨淨咧；黏鼠枋上背也滄滄个壅塵，連黃蚘、金姑都黏毋核哩啲！啊老鼠咧！佢還下把下會跔水管趕上來遠佢下，看著有人在該，斯賊目賊目捉人緊看，加添翻頭又趕落去咧！吾心肝肚想：「反正你莫來做竇、莫帶歸陣來、莫入到吾屋肚去，偲兩儕斯井水不犯河水！佢無愛捉你，你也毋好來造磨佢！」

到今，兩個死無膽个妹，不管佢仰脣膏嗟，都毋肯上三樓洗衫間去，因為，三不二時都看得著該隻老鼠像行灶下个樣，在洗衫間頂个竹篙面頂、鐵窗桎脣無斯矮牆頂遊來遊去，靠勢人毋敢擎掃把逐佢，驚佢莫一下跳對圍身過來，看著人，半屑都毋驚人，用一雙金金个大目珠目盯緊看人，實在有罉好膽！

捉老鼠！唉～～！實在奈佢毋何啊……！



作者感言

張瑞玲

首先，愛勞瀝評審先生个牽成同鼓勵，分俵有機會用自家个語言寫自家生活裡肚个事情。

因為本身毋係真浪漫个個性，寫毋出心肝肚對人、對事个深深情感，恁堵好一隻遊遊野野个老鼠，好恬恬撞入吾个生活裡肚，提供俵一個真好个寫作題材。當初時，也不管會得獎無，俵用輕鬆、心色个態度來記錄晡老鼠个過程，無胚想，嘎正經得獎咧！實在有罈歡喜！